

Olschbrigger



Kerweredd

2022

Anfang vum Enn

Ehr liewe Leit unn Vochelzichter
Olschbrigger Denker unn ach ehr Dichter

Bildzeitunge ausem Ort unn Presseberichter
es brenne se wirre, die Olschbrigger Kerwelichter

mit Freude derf ich eich verkünde
vunn de Olschbrigger Buwe unn Määd die Sünde

es fräht mich eich do wirre se siehe
fer eich mei dumm gebabbels erinseziehe

sogar die Musik fräät sich mit Heiterkeit
sie spielt „Ein Prosit der Gemütlichkeit“

Scheiss Urlaub

E bekannter Mann ,do ausem TuS
hat gemähnt dass er no Bad Tölz fahre muss

bissje Urlaub mache dass wär doch schää
unn käm ihm doch jetzt ganz gelää

dort ohkumm wurden Aktivitäre gesucht
unn schlussendlich e Ballonfahrt gebucht

so e großer Balle wo ganz schää hoch flieht
dass mer ach mo üwwers Ländlein sieht

e nuff unn e runner isser ganz gut komm
späternaus wurd awwer de Fußbus genumm

sei Schlissel vum Auto war nimmie do
das kann doch net sinn ,sah emo

er hätt ne doch fesched am Mann gehatt
jetz warer fort unn das iss Fakt

die Tasche alle abgesucht,nix se finne

vielleicht leiht er jo im Ballonkorb drinne
am Telefon bei denne ging kenner dran
er rief vermutlich ausserhalb der Geschäftszeite an
bringt alles nix hat er sich gedenkt ,
e Mietauto geläähnt unn häängelenkt
er war sich sicher ganz unn gar
dass dehäm doch emol e Ersatzschlüssel war
faschd Dehäm , hats Delefon gerabbelt
unn ihm e Ballonfahrer es Ohr abgebabbelt
der wollt frohe ob ne seine Besitzer wirre braucht
denn Schlüssel, der im Ballon iss uffgetaucht
es Auto gedreht unn serick mit dere Schissel
uffem schnellschde Wääg ab zu seim Schlüssel
unn wer hätts gedenkt in dere ganze Hasst
es war de Schlüssel der an seim Auto basst
uff dass das dem Kerl nimmie basseert
er nimmie 10 stunn lang fer de Arsch do rum fährt
an die jetzische Spritkoschde garnet se denke
wünsch ich dem Kerl allzeit frohes lenke
Die Musik Spielt dem alte Falter
„Mein Gott Walter“

Mundraub

E ganz bekannter Protagonischd aus de Hohl
fiehlt sich heit bestimmt besonnersch wohl
denn desjohr muss ich mit seine Geschichte passe
der hat sich mo nix zu Schulde komme lasse
awwer e Kerweredd wär kää Kerweredd
wenn se net e bissje was mitem se tue hätt
so geht der dasjohr ohne gescholl se kriehe aus
allerdings helfft dodevor sei Gattin aus
die hat nämlich e hartie Story gebrung

unn hat bei de Nochberschaft efach die Getränke mitgenumm

bei denne Leit die wurden do bestohle
gebts vor de Hausdeer ach immer was se hole

muss ich zugewwe sieht ach inladent aus
do steht nämlich meischdens bissje Bier vorm Haus

das iss Geschichte deed ich mol behaupte
seit die Nachbarschaft de Sprit dort raubte

ufffalle duht sowas wenn kenner was seift
unn trotzdem de kaschde Diät betreibt

hääst in dem Haus war sich kenner seiner Schuld bewusst
fakt war nur das wirre enner inkaafe musst

dort wurden sich geheseitisch Vorwürf gemacht
bis e uffmerksamer Zeuge klärt mo uff die Sach

laut dem kam die Nochberin alle Owend gewitscht
unn hat uff de Familie Witzler ehr koschde enner gepitscht

dem dorschtige Mundräuber wurd dann es Handwerk geleht
indem halt nix mieh se saufe do steht

unn die Moral vunn der Geschicht
scheisse wenn dich enner beim klaue vewischt

Die Musik jetzt wirre in die Taschde haut
vun de Prinze „Das iss alles nur geklaut“

Bruchpilote

In de Straussjuchend gebts Leit die Sache mache
üwwer die mer dann do an de Kerweredd lache

eh Straussjuchend zeichnet sich ach immer dorch was aus
bei uns steche do ganz gewaltisch die Bruchpilote raus

bassere ,gar kää Fraach ,kenne jedem mo Sache
ich froh mich nur wie die des als mache

die äänd schmeisst an de Mall de BMWuchtisch uffs Dach
unn opfert paar Woche später de negschde in Otterbach

weil in Otterbach an Volksbank stehn so Palisade
mitem e normale pkw kammer do net drüwwer fahre

jetzt derfe ner roode was der iss basseert,
genau sie hats probiert mit ehre Gefährt

an der Stell muss ich denne Kranfahrer lobe
der se hat mit ihrer Schissel vunn de Palisade gehowe

die negschde zwää Kaschber ,ich kennt se faschd greife
sich in Herschern gejesidisch die Stossstange reiwe

weil der ähnt nämlich bremst ,unns de anners net sieht
unnem dann mit hunnert in de Kofferraum flieht

Geschichte ausem Paulanergarte
die mich do jedjohr uffs neie erwarte

irgendwann fahrn se vielleicht mo gut
solang ertönt „ Mei Auto fährt tut-tut"

Walter Röhrl fer Arme

Eines schönen morgens ,eigentlich mitte in de Nacht
hann drei Rennfahrer e sauwer Kunschticksche gemacht

die hann nämlich vunn de Muddi es Auto stibitzt
unn sinn dodemit e bissje dorch de Wald geflitzt

die meischde vunn eich wissen bestimmt vunn was ich bericht
fer die annere erzähl ich doch nochemo die Geschicht

Also die Buwe ,allegar ohne Schein
steie jetzt nachts in das Auto ein

denne Bolide hannse dann in bewehschung gesetzt
unn sinn dodemit e bissje dorch de Wald gepetzt

in Frankelbach die nei Stross owwe runner um die Ecke
Kontrollverlusd unn dann ab durch die Hecke

das Auto war dann leicht verbaust
ehrlich gesaht mache se e Pickup draus

es bissje ab vum Wegesrand ,
de Kombi uffem Dach dann stand

die Helde warn ganz iwerraschd

was sie do hat fer e Schicksal erhascht

nix mieh vor unn nix mieh serick
do helft blos schwer Gerät miteme dicke Strick

denne buwe hats dann an ehre Latein gefählt
unn aus Verzweiflung hannse die 112 gewählt

awwer ach die Feuerwehr kunnt denne Karre
net rauszieh oder sunschd was mache

e bekanntes Olschbrigger Abschleppunnehmer
durft sich Daachs druff die Ehre gebe

unn dass Ding no Olschbrigge zerre
worer dann soll verkümmelt werre

dere Eigentümerin vum Auto wünsch ich alles gude
das mit denne dolle iss jo käänem zusemute

unn was jetzt die drei Helde anbelangt
die hann nix gehatt ,ausser bissje getankt

die Moral vunn der Geschicht
Muddis Auto klaut man nicht

die Musik spielt mit viel Spass
vum Markus es Lied „Ich geb Gas“

Yalla Yalla Shishabar

Jetzt werd e Protagonischd vumm Opfer zum Täter
es geht wirre um Getränke ,dazu mehr später

uff alle Fälle sinn die in Urlaub gefahr
Ägypte hieß es Ziel ihrer Wahl

ab in de Fliehscher zu de Pharaone
wo ach die Sphinx unn viele Kamele wohne

die ware in dem Land werklich gern zu Gaschd
unn hann owends ach e tollie Tradition erhascht

in ner Bar warn se nämlich Wasserpeif raache
do unne e Kulturgut kennt mer ach saache

zu Zeite vunn Corona iss das garnet so leicht
zum töte vunn Vire werd Desinfektionsmittel gereicht

Do hängt mer dann sei Mundstick ins Glas
Desinfizierts also unn weiter geht der Spass

allerdings hätt mer das dem Kerl misse erkläre
der hatt nämlich gemäähnt achgott was e lieb Määre

dass done iss jo wirklich de Hit
die bringt sogar gleich was se trinke mit

das Mundstick wurd als Strohhalme entfremd
mit dem der Kerl mo e ordentlicher Wurf nemmt

ich glaab net dass er uff de Geschmack komm iss
meiner Määnung no schmeckt das wie geschiss

Daachs druff hater uffem hääbsche gehockt
nodem er verdaut war der Virekillerschok

fer denne Kerl gebts scheinbar noch viel se lerne
egal ob Dehääm orre in de Ferne

sei Fraa werd ne uffem Lehrweg begleite
denne se wie de Urlaub ach zusamme bestreite

Die Musik spielt dem alde Lord
„Schnaps ,das war sein letztes Wort"

Halloween

E Baba vum Waldhof hat zwää Kinner
die fräähn sich jo uff Halloween immer

an Halloween will mer jo paar Sache net misse
bissje Deko ,bissje Grusel unn e paar Kürbisse

de Babbe hat sich misse bissje blamier
er hatt vergess Kürbisse zu organisiere

Sunndachs so Dinger se kriehe iss net so leicht
weshalb der Kerl bissje dorch die Weltgeschichte schleicht

wie das der Zufall dann so wollt
sinn beim Dönermanni im Schaufenster paar rumgerollt

er iss dann in dem Laden mo guggen gang
ob er do net e Deal aushandeln kann

gehannelt bis die Schwarte kracht
was mer fer sei Kinner net doch alles macht

em Dönermann zwää Döner unn e Krautkopf abkaaf
wofür er dann ach die Kürbisse mitnehmen darf

jetzt kenne ner eich vorstellen wie der Deham im Deerrahmen stand
mit seine Kürbisse ,zwää Döner unn e Krautkopf in de Hand

frei no dem Motto :Döner heute unn Krautwickel moje
kann er schlussendlich sei Kinner mit Kürbisse versorje

denk droh das das Jahr wirre Halloween iss
die Musik spielt ein kleiner Kürbis

Oberunterbürgermeister

Jetzt ehr Leit will ich eich Berichte
Vunn unserm Bürgermäschder eine Geschichte

Der hat sich in Gedanke schunn es Lorbeerkränzje geschmickt
Unn e Artikel an die Zeitung geschickt

De Programmverlauf vunn de kerb sollt es sein
Nur schlau, wurd dodraus kää Schwein

Die erscht Mannschaft soll es Kerwespiel im Feschdzelt ausführe
Unn de Baier Wolfgang mit de Zirkusmusikante musiziere

Das iss em leider ganz schää misslung,
Hätter in de Badwann doch lieber eh Liedsche gesung

Zum Abschluss sah mer dem Bürgermeister zur Ehr
Der Weg zur Legende iss steinig unn schwer

Vielleicht kommt das ach vum gehobene Alter
Es ertönt zum zwätte mol „Mein Gott Walter“

Schluss aus Ende

Lang genuch hann ich jetzt berichtet
Vunn denne Knaller unn ehre Geschichte

Jedie redd hat emol e End
Dem ich mich jetzt so langsam zuwend

Geheert hanner wirre die wildeschde sache
Was erwachsene Leit fer dummzeich als mache

Ich hoff die Moral zum Scheisse baue bleibt
Wer wääs wer negschd johr die kerweredd schreibt

Vielleicht wirre ich, dass werr mer Mo siehe
Das ich Geschichte hann lossen weiter die Kuh schää fliehe

Scheuen bloß net vor Schandtate serick
Dann gebt das negschd Johr wirre e schää Stick

Bei dere dorschdisch Truppe kenne ner noch e Kerweredd kaafe
Schmeisse ruhisch was e ninn, an de kerb iss net se spare

Zum Schluss fällt mer jetzt noch uff
das unser Strauss jo noch gedaaft werre muss

Ich deet sah ich machs kurz unn knackisch
Der Kerl iss Vunn de Hohl unn als emol dabbisch eeeehhh zackisch

Die Buwe greife de Määd an de Kitzler
Unser Strauß hääßt desjohr Witzler!!!

Witzi zur ehr dass der dei Name traht
bische gern fer mer e Bier auszugewwe ingelad.

Es war mir eine Ehre eich beluschdischd se hann
Negschdohr wirre selwie Uhrzeit dann

Jetzt sinner uffgeruf all nommo die kerb ohsekreische,
Bevor ich wirre vunn dere lääder weiche .

Schluss ,Ferdisch aus ,ab do gebts nix mie ihr Geier!